

## Su gattu stinghirizzu.

Candu deu fia ancora unu pipiu: tènemus unu gattu nieddu, cun is ogus asùlus, fut eleganti e de corporatura fini e po cussu de nòmini ddi zèrriamus stinghirizzu. Nosu femus una famiglia pòbera e non conoscèmus s'ingàngiu. Una bella dì, babbu miu, fut rientràu a domu, cun d'unu imboddicamini in manus e deu curiòsu, mi fia domandau ita iat a cuntèniri. Issu s'hiat zèrriau a totus, mullèri e fillus, a giru de sa mesa, po si fai biri sa sorpresa: candu femus totus prontus, hiat sboddicàu su paperi e de aintrus nnd'hiat bogàu unu bellu arengu mannu. Deu candu hia biu cussu pisci siccàu, min-ddi furint calaras is salias e dd'hia nau a babbu: innòi nci at'essi s'acòreddu miu puru?

- No! Fillu miu: custu non est cosa de papài arrògus, genti chi hat provàu, dd'hant agatàra imbriga asutta de una carràda de binu. Altrus furinti andaus a buffai acua a s'arriu, si furinti crepàus totus.

- Mentras babbu fut donendu spiegazionis: stinghirizzu nnd'arribada currendi, cument'è unu maccu e tottus si seus azziccàus, su fragu de s'arengu ddu schissierà, meulendi cument'è unu dimoni.

- Istu, istu, dd'hiat nau babbu: custu gattu, est sèmpiri in mesu de peis.

- E sigument nc'hiat pressi, fut passàu a sa leziòni: cumentì àndat papàu s'arengu. Babbu hiat pigàu unu spagu longu e dd'hiat infrissiu in is ogus de su pisci, fendiddi unu bellu nuu e a pustis dd'hiat fatu passài a pizzus de su cuaddu armau, (trave) fendiddu calai abbàsciu cun su spagu, cumentì si fait cun sa siccia in funtana e su spagu fissàu a una puncia in su muru, po non lòmpi stinghirizzu. A ora de prandi hemus arridàu su pani e babbu sin dd'hiat postu una fitta a sa manu manca e una a sa deretta, dimostrèndi cumentì fai. In mesu de su pani, a unus, a unus ponemus su pisci e ddu stringemus, po ddi podi attaccài su fragu e sùbitu accoppiamus is fittas a pari, po non si fuiri su fragu. Candu ponemus is fittas in bucca, da sa sonamus a tipu sonettu, po nosu cussa fut s'ora prus bella de totu sa dì, poita totu in pari sonamus, baddamus e prandemus e femus prenus de allirghia, cun pagu spesa.

Po fortuna, stinghirizzu fut accanta de si lassài solus: is gattus de bixinàu furint in crabetura, e ddu zèrrianta, fut su tempus de s'innamoramentu e unu gattu cumentì a stinghirizzu, non podiat mancai a s'apuntamentu. Deu hia pigàu una strìggiula e dd'hia beni puliu, po ddi fai luxi su pilu e po essi prus eleganti, dd'hia accapiàu unu frochiteddu a sa coa.

Prima de ddu lassài andai, s'ultima raccomandaziòni: stinghirizzu, castiamì beni, in is pipias de is ogus e poni in menti: ca innòi nci andat de mesu, s'onori de sa famiglia nostra: candu ci besis de domu: non ti pongas cun sa primu gatta chi agatas in sa bia, controla beni chi non portiri arrungia, deghinò min ddi tragas s'arrungia a domu. E in prus faididdi disigiai, poita tui: ses unu principi e meritas una pisitedda de razza nobili.

Mi pariat ca hiat cumprendiu totu e dd'hia lassàu andai fiducciòsu. A intrus de sa notti, stinghirizzu fut partiu e nosu hemus agatàu tranquillidadi, candu ponemus sa mesa. Ma deu senza de su gattu non giogamu prus, e ddu pensamu a tottu is oras.

Una notti scuriòsa, chi s'illuminada de lampus, sighius de tronus, de u fia attacàu a sa gunnedda de mamma, po sa timòria, issa fut recitendi: Santa Barbara e santu Jaccu... e de u dd'hia interrùmpia narendi: mamma, ma stinghirizzu a cust'ora, ita hat'essi fendi?

- A cust'ora: est impostàu po topis!

- De u cuntentu, assumancu si fait sa cena, datu ca non pigat prus, mancu su fragu de s'arengu. E nosu in su fra tempus hemus sighiù ha spruppài su pisci, fìnas a sa spina, non hiat aturau nudda, fetti sa conca cun sa spina e mamma hiat nau:

- Custa est sa parti po stinghirizzu.

- Unu bellu mangianu, sa notizia mi fut arribada a su lettu:

- Stinghirizzu est rientrau!

- De u fia andàu currendi po ddu saludai, ma candu dd'hia biu, non dd'hia conòtu: fut prus stinghirizzu de candu fut partiu. Is ogus unfraus, unu scarràffiu mannu in facci e in prus, m'hiat perdiu su frocchiteddu, chi dd'hia postu a sa coa.

Mi dd'hia fattu unu sermòni, ddoindd'hiat po issu e po aterus dexi gattus arestis: castia cument ti ses redùsiu: gei ndd'hadai fattu de arrisu, cussa pisitedda, candu t'hat biu cumbattendi a duellu po issa, cun su gattu de sa bixina e no nai e chini est cussu puru; becciu e cun sa coa totu spinnìada.

E tui? Innamoràu cottu, cument' è unu stùpidu: ti ses fattu arrogai a mussius: ma chini ti dd'hat postu a fai, ti ast'essi crocàu in domu, assumancu su fragu de s'arengu hias pigàu.

A pustis mi fiat cumpassìoni e dd'hia perdonau, poita issu, totu custu dd'hiat fattu po amori e po fai aumentai sa famiglia de is stinghirizzus. Dd'hia pigàu e curau beni e po si pònneri sùbitu in forza : dd'hia donau sa conca de s'arengu cun sa spina. Non ddi pariat berus, cun su famini chi tèniat, non si fut stentàu, mancu mazzièndidda beni. Prus a tardu, dd'hia biu buffendi acua in sa scivedda e non d'acabada prus.

De u fia timendu po non si squartarai su gattu, ddoi fia accostàu e dd'hia nau: ma o stinghirizzu, ita ses cumbinendu?

Non mi ses mortu in duellu, i òi mi moris: de su sidi.

Raffaele Lussu

Sinnai 2011

3° premiu Campidanu

Selargius 2011